

ԺՈՂՈՎՐԴԻ ԴԱՐԱՎՈՐ
ԻՂՁԸ

Մոտ մեկ ու կես միլիոն հայ աշխատավորներ, կտրված հայրենի հողից, ցրված են աշխարհով մեկ: Կրելով անսահման տառապանքներ, նրանք ենթակա են հալածանքի ու ուշքնչացման: Իրենց փրկության մասին բազում տարիների ընթացքում նրանք շատ խոստումներ են լսել, շատ-շատերն են իրենց հայտարարել նրանց «պաշտպանը»: Բայց հայ պանդուխտները, որոնց տառասույանքի լուծը գնալով ավելի ու ավելի է ծանրացել, լավ գիտեն այդ խոստումների արժեքը և լավ են ճանաչել իրենց այդ «պաշտպաններին»:

Եվ աշխարհի որ ծայրում էլ գտնվելիս լինեին, նրանք իրենց հայացքն ուղղել են դեպի Սովետական մեծ Միությունը, դեպի մայր հայրենիքը, անհուն հավատով սպասել են մեծ Ստալինի փրկարար խոսքին: Եվ մեծ առաջնորդն ասաց իր խոսքը: Նրա անմիջական ցուցումով սովետական կառավարությունը որոշում ընդունեց արտասահմանից հայերի Սովետական Հայաստան վերադառնալու կապակցությամբ ձեռնարկվող միջոցառումների մասին: Փրկության ճանապարհը բաց անող այդ լուրը արևի ջերմացնող ճառագայթների նման տարածվեց աշխարհով մեկ: Ամենուրեք հայ պանդուխտը ուղղեց տասնյակ տարիներ կռացրած մեջքը: Տասնյակ-հազարներ դեն շարտեցին պանդխտության ցուպը և ճանապարհ ելան դեպի Հայրենիք:

Հայրենիքը գրկաբաց ընդունեց իր տառապյալ զավակներին: 1946 թվին Հայաստան վերադարձան մի քանի տասնյակ հազար մարդ: Նրանք բոլորն էլ ստացան օթևան և աշխատանք, ստացան լիարժեք մարդ կոչվելու իրավունք, դարձան սովետական քաղաքացիներ: Աշխատանքի կարոտ բանվորը կանգնեց դազգահի մոտ, իր քրտինքի պտուղը՝ երբեք չվայելած ռանչպարը միացավ կոլխոզային ամենակարող կարգերին:

Հալածված բանաստեղծը ամբողջ սրտով գովերգեց մայր Հայրենիքը, կարիքից թափառաշրջիկ դարձած երաժիշտը շրջապատվեց ընկերական ջերմ մթնոլորտով, ամբողջ կյանքում բեմի մասին երազող երգչուհին առաջնակարգ օպերային թատրոնի բեմից երգեց մայրենի շքնաղ մեղեդին: Ուսման ծարավի երիտասարդությունը դիմեց դեպի դպրոց ու համալսարան: Բարձրագույն ուսումնական հաստատություններն ընդունվեցին հարյուրավոր երիտասարդներ, 6.000 երեխաներ սկսեցին դպրոց հաճախել: Նրանք այլևս չեն մոռանա մայրենի լեզուն: Նորից գործել սկսեցին ավելի քան տաս տարի առաջ իրենց դերն ավարտած անգրագիտության վերացման դպրոցները, որտեղ նորեկ հազարավոր անգրագետներ սովորում են մայրենի լեզուն:

2.400 ընտանիք ձեռնարկեցին մայր հողի վրա իրենց սեփական հարկը կառուցել, դրա համար պետությունը նրանց տվել է ավելի քան 35 միլիոն ռուբլի վարկ:

Ահա թե ինչու հալածանքներից ու կործանումից փրկված այս տասնյակ հազարավոր հայ աշխատավորները այսօր միաբերան ասում են, — շնորհակալություն քեզ, մեր իմաստուն առաջնորդ, մեր ազատարար, մեծ Ստալին: